

04 NOV 2000

Mahathir-Seni

LANGKAWI MAMPU JADI TUMPUAN SENI SEDUNIA, KATA DR MAHATHIR

LANGKAWI, 4 Nov (Bernama) -- Langkawi mampu mencapai taraf "global art resort" melalui Festival Kesenian Antarabangsa Langkawi (Lifa), kata Datuk Seri Dr Mahathir Mohamad hari ini.

Perdana Menteri berkata Langkawi yang terkenal sebagai destinasi pelancongan dan percutian utama di negara ini akan lebih dikenali di peringkat antarabangsa dengan adanya Lifa.

"Pulau legenda ini juga mampu mencapai taraf global art resort setelah mengukir nama dalam industri pertahanan laut dan udara yang diadakan melalui Lima (Pameran Udara dan Maritim Antarabangsa Langkawi) setiap dua tahun sekali," katanya.

Berucap merasmikan Yayasan Kebudayaan dan Muzium Ibrahim Hussein di sini, beliau berkata institusi itu dan Lembaga Pembangunan Langkawi (Lada) perlu menggembleng tenaga untuk mendapatkan periyertaan berkualiti di peringkat antarabangsa dan juga di kalangan rakyat tempatan.

"Pencapaian dan kejayaan pelukis-pelukis tanah air sehingga bertaraf dunia tidak dapat dinafikan lagi dan hasil karya mereka telah menjadi milik dan kebanggaan warga antarabangsa," katanya.

Malah, katanya, hasil karya itu pernah ditawarkan hingga mencecah jutaan Ringgit dan kejayaan itu perlu dipertahan dna diteruskan lagi manakala bakat-bakat muda pula harus berani untuk menjelajah dan meneroka dunia seni serta sanggup menyahut cabaran sebagaimana generasi terdahulu.

Lifa yang dianjurkan oleh yayasan itu dengan kerjasama Lada dan kerajaan Kedah, disertai 100 karyawan seni pelbagai disiplin dari dalam dan luar negara. Ia berlangsung selama 10 hari di pulau ini dan berakhir hari ini.

Dr Mahathir berharap yayasan itu dan institusi seni yang lain akan dapat meletakkan Malaysia sebagai negara yang berupaya menjadi pusat kecemerlangan seni dan kebudayaan bertaraf dunia setanding dengan institusi yang seumpamanya.

Beliau berkata prasarana budaya yang canggih seperti Istana Budaya, Dewan Filharmonik Petronas serta Balai Seni Lukis Negara, semuanya teletak di Kuala Lumpur, ialah antara sumbangan kerajaan kepada usaha membangunkan seni budaya dan seterusnya peradaban serta tamadun masyarakat negara ini.

Kerajaan juga turut memberi pengiktirafan kepada penggiat seni dan karyawan melalui Skim Anugerah Seni Negara serta Skim Pembiayaan Seni.

Kerajaan juga menyediakan kemudahan pengecualian cukai pendapatan korporat dan individu terhadap nilai penajaan, sumbangan dan pembelian karya-karya seni lukisan yang dihadiahkan kepada institusi seni kerajaan.

"Pembangunan khalayak seni perlu digerakkan dari sekarang dan menjadi sebahagian daripada strategi pemasaran seni," katanya.

Dr Mahathir berkata usaha mempertahankan khalayak yang setia serta pertambahan khalayak yang baru akan memakmurkan lagi bidang itu.

Beliau berkata peranan seni dalam ekonomi negara juga penting dalam mereliasasikan matlamat membangunkan kesenian dan peradaban yang unggul untuk negara.

Keperluan kepada pembaharuan, motivasi ke arah penerokaan yang berinovasi tinggi dan cemerlang serta kefahaman yang mendalam dalam berkarya perlu mengambil kira peradaban agung dunia dan pembaharuan kehidupan kemanusiaan supaya seni itu akan dapat dipertahankan, katanya.

"Nilai baru akan terbentuk dan ini termasuk mengubah minda masyarakat di samping berupaya mengintegrasikan masyarakat," katanya.

Perdana Menteri berkata peranan seni dapat ditonjolkan sebagai citra negara yang dapat dijadikan teladan dan panduan terutamanya daripada aspek perkongsian budaya di kalangan rakyat Malaysia yang berbilang kaum.

Seni yang bermutu tinggi dapat mempamerkan dan menerapkan ciri-ciri keperibadian dan imej nasional, katanya.

"Di sinilah akan lahirnya rasa kekaguman dan rasa kecintaan rakyat negara ini terhadap warisan seni budayanya," kata Dr Mahathir.

Muzium yang mempamerkan hasil karya pelukis Datuk Ibrahim Hussein dan beberapa karya artis luar negara terletak berdekatan Pantai Pasir Tengkorak dan siap dibuka kepada orang ramai sejak November 1998.

-- BERNAMA

JM NH MAI